

IKA-2 ARALIN

**NATUTUTO
KANG
LUMAKAD**



Sa Araling Ito'y Pag-aaralan Mo
Ilagay Ang Iyong Kamay Sa Kamay Ng Diyos
Sinikap Na Ba Ni Satanas Na Mahulog Ka?
Nagtiis Ka Ba Alang-Alang kay Cristo?
Nanlulupaypay Ka Ba O Nililigalig Ng Mga
Alinlangan?
Mahal Ka Ng Iyong Ama
Lutasin Ngayon Ang Mga Alinlangan
Magsisi
Maniwala Sa Ebanghelyo At Manampalataya Kay
Jesu-Cristo

Ilagay Ang Iyong Kamay Sa Kamay Ng Diyos

Napakasaya ng mga magulang kung humahakbang na ang kanilang sanggol! At napakasaya ng iyong Ama sa langit kung ikaw na Kanyang anak ay natututong lumakad na kasama Niya sa pamumuhay Cristiano! Huwag kang matakot; ilagay mo lang ang iyong kamay sa kamay ng Ama, at tutulungan ka Niya. Bawa't araw, pagkagising mo, patulong ka sa Kanya sa lahat ng iyong gagawin.

Ang Gagawin Mo

Lagyan ng X ang puwang sa tabi ng tamang sagot:

1. Saan inihahambing ang iyong buhay bilang isang Cristiano sa araling ito?

- a) sa isang taong nakalalakad na mag-isa
 ----- b) sa isang sanggol na hindi makalakad
 ----- k) sa paglalakad na hawak ka ng Diyos.

Sagot: 1. k) sa paglalakad na hawak ka ng Diyos.

Sinikap Na Ba Ni Satanas Na Mahulog Ka?

Si Satanas, ang Diyablo, ay kaaway ng Diyos at ng bawa't Cristiano. Sinisikap niyang ikaw'y tisurin at nang ikaw ay mahulog. Maaaring guma-

mit siya ng pag-uusig, pag-uyam, pagbigò, o pagtukso. Sisikapin niyang ikaw'y mag-alinlangan tungkol sa iyong kaligtasan. Kinakalabang lagi ni Satanas ang mga Cristiano at sinisikap niyang mailayo sila sa Diyos. Hinahasikan niya ng mga pag-aalinlangan at kahirapan, lalo na, ang mga bagong Cristiano. Ayaw niyang matututo kang lumakad na kasama ang Diyos.

Kaya, huwag kang magtataka kung magkabukol ka habang nag-aaral kang lumakad. Ang bata'y nababangga sa silya at nasasaktan, o nawawalan ng panimbang at natutumba, subali't hindi nagiging dahilan ito upang huwag na siyang mag-aral ng paglakad.

Ang Gagawin Mo

2. Matapos na ikaw'y maging Cristiano

- a) tapos ng lahat ang suliranin mo.
- b) sisikapin ni Satanas na mahulog ka.
- k) hindi ka na mabibigo o uusigin.

3. Madalas na sinisikap ni Satanas na ang mga bagong Cristiano'y

- a) magalak sa kanilang kaligtasan.
- b) mag-alinlangan sa Diyos.
- k) mag-alinlangan sila'y ligtas.

Mga Sagot: 2.b) sisikapin ni Satanas na mahulog ka.

3. k) mag-alinlangang sila'y ligtas.

Tandaan lamang na ang iyong Ama sa langit ay higit na malakas kaysa sa diyablo at aalalayan ka Niya.

Binibigyan ko sila ng buhay na walang hanggan, at kailanma'y di sila mapapahamak; hindi sila maagaw sa akin ninuman. Juan 10:28.

Ang Gagawin Mo

4. Sauluhin ang sinabi ni Jesus sa Juan 10:28.

Nagtitiis Ka Ba Alang-alang Kay Cristo?

Huwag kang magulat o magalit kung pagtawanan ka ng iyong kaanak o ibang kaibigan dahil sa pagtanggap mo kay Cristo. Pag-uusigin ka nila. Ito'y isang karangalan at karapatan ang magtitiis alang-alang sa Kanya na namatay sa krus para sa atin. "Pasanin natin ang ating krus" at sumunod sa Kanya; sa gayon, maipakikita natin ang ating pagpapahalaga sa Kanyang pagpapakasakit dahil sa atin.

Bukod dito, may pangakong gantimpala ang Panginoon sa magtitiis alang-alang sa Kanya.

Kung ibig ninumang sumunod sa akin, **limutin** niya ang ukol sa kanyang sarili; pasanin ang kanyang krus araw-araw, at sumunod sa akin. Lucas 9:23.

Mapalad ang mga pinag-uusig dahil sa kanilang pagsunod sa kalooban ng Diyos, sapagka't makakasama sila sa Kanyang kaharian. Mapalad kayo kapag dahil sa aki'y inaalimura kayo ng mga tao, pinag-uusig at pinagwiwikaan ng lahat ng uri ng kasamaan na pawang kasinungalingan. Magdiwang kayo at magalak, sapagka't malaki ang inyong gantimpala sa langit. Mateo 5:10-12.

Ang Gagawin Mo

5. Kung ikaw ay dumanas ng pagtitiis alang-alang kay Jesus, dapat kang.
- a) malungkot.
 - b) magalit at lumaban.
 - k) magalak sapagka't may gantimpala ka sa langit.

Sagot: 5. k) magalak sapagka't may gantimpala ka sa langit.

Nasisiraan Ka Ba Ng Loob O Nililigalig Ka Ng Mga Alinlangan

Huwag kang manlupaypay kahit nahihirapan kang gumawa ng matuwid. Ang taong ipinanganak na muli ay tunay na anak ng Diyos, nguni't

kailangan pa rin niyang matutong lumakad. Kapag nagkakamali ang isang bagong Cristiano, sinisikap ng Diyablo na papanghinain siya sa pagpapalagay na: “Hindi ako anak ng Diyos, kaya nakagawa ako ng ganitong kamalian.”

Nalilito ang ilang mga bagong Cristiano at sila’y nag-aalinlangan. Iniisip nila: “Hindi ko kaya ang buhay Cristiano; napakahirap. Mabuti pa’y magbalik na ako sa dati at huwag nang maglingkod sa Diyos. Saka, wala naman akong nakitang gaanong pagbabago sa sarili ko, tulad ng sinasabi ng mga Cristiano. Marahil ay hindi nga ako Cristiano.”

Nagkaroon na ba kayo ng ganitong karanasan? Tandaan, ito’y galing sa iyong kaaway na nagsisikap na kayo’y mahulog. May mga taong higit na nakadarama ng kagalakan kung sila’y naliligtas; kaya, huwag kang mag-alala kahit na ano ang nararamdaman mo. Habang natututuhan mo ang tungkol sa ginawa ng Diyos na ikaw’y anak Niya, lalo kang magkakaroon ng kagalakan. Ang iyong kaligtasan ay hindi nasasalig sa iyong nadarama o hindi nadarama, kundi sa katapatan ng Diyos na nagkaloob sa iyo ng buhay at kaluluwa.

Kung nadapa ka o nahulog, hindi nangangahulugang hindi ka matututong lumakad, o hindi ka na anak ng Diyos. Humingi ng kapatawaran sa iyong mga pagkukulang, at tumindig ka’t muling sumubok.



Ang pagbabago mo, pagnanasang makalugod sa Diyos, at ang pag-aalala mo dahil sa iyong pagkukulang ay mga katibayan ng bagong pagkatao. Kaya't huwag kang manlupaypay. Tandaang may mga anak na higit ang suliranin kaysa mga iba sa pag-aaral nilang lumakad.

Ang Gagawin Mo

6. Kung nasisiraan ka ng loob at nalulungkot, dapat mong tandaan na

- a) laging masaya ang tunay na Cristiano.
- b) magkakatulad ang kagalakang nadarama ng lahat ng Cristiano kung sila'y naliligtas.
- k) habang pinasasalamatan mo ang Panginoon sa Kanyang mga biyaya, lalo kang makadarama ng kagalakan.

7. Ang iyong kaligtasan ay nasasalig sa

- a) katapatan ng Diyos.
- b) iyong nararanasan.
- k) iyong kabutihang taglay.

Mga Sagot: 6. k) habang pinasasalamatan mo ang Panginoon sa Kanyang mga biyaya, lalo kang makadarama ng kagalakan.

7. a) katapatan ng Diyos.

Mahal Ka Ng Iyong Ama

Palagay mo kaya'y kagagalan ng magiliwing mga magulang ang kanilang anak na natumba, o kaya'y lalayuan ito at iiwan kung masaktan nito ang sarili? Aba, hindi! Kakalungin nila't aaluin ang bata saka uudyukang magpatuloy hanggang sa makalakad na matuwid. Pababayaang kaya ng Diyos ang Kanyang anak na nagpapasimula pa lamang lumakad? Hindi ito mangyayari! Sabihin mo sa Kanya sa panalangin: "Salamat, Ama, sa pag-aakay mo sa akin at pagtuturo sa paglakad. Mahina ako nguni't alam kong tutulungan mo ako sa dapat kong gawin."

Dapat mong malamang pinapatnubayan ka ng Diyos sa iyong buhay Cristiano sa pamamagitan ng Kanyang Espiritu Santo at Salita, ang Biblia. Basahin mo ang Biblia at manalangin araw-araw. Ito'y makatutulong sa iyo na mawala ang iyong alinlangan at makalakad ka nang di-natutumba.

Ang Gagawin Mo

8. Kung natisod ka at nakagawa ng di-narapat, tiyak na ang iyong Ama sa Langit ay
- a) magagalit at itataboy ka.
 - b) magpapatawad sa iyo at tutulungan kang magpakabuti.
 - c) lalayo sa iyo.

9. Aakayin ka ng Espiritu Santo ng Diyos at ipakikita sa iyo ang dapat mong gawin kung:

- a) magbabasa ka ng Biblia at manalangin araw-araw.
- b) aalamin mo ang iyong kapalaran ayon sa sinasabi ng mga bituin.
- k) makikinig ka sa iyong mga kai-bigan.

Mga Sagot: 8. b) magpapatawad sa iyo at tulungan kang magpakabuti

9. a) magbabasa ka ng Biblia at manalangin araw-araw.

Magpasiya Na Ngayon at Alisin Ang Mga Alinlangan

Marahil, iniisip mo kung nagawa mo na ang lahat ng inaasahan ng Diyos na gagawin mo upang maligtas. Malinaw na sinasabi sa atin ni Cristo ang bahaging dapat ganapin ng tao upang maligtas; kaya, tingnan natin kung ginawa mo na ito. Kung mayroon ka pang dapat gawin, magagawa mo na ito ngayon upang matiyak kung ikaw ay ligtas.

Dalawang bagay ang ipinagagawa ng Diyos sa iyo upang ikaw ay maligtas; magsisi ka ng iyong mga kasalanan, at maniwala sa ebanghelyo.



Ang Gagawin Mo

10. Ano ang ipinagagawa sa iyo ng Diyos upang ikaw ay maligtas?

- a) magsisi ng kasalanan at maniwala sa Ebanghelyo.
- b) magpenitensiya at umanib sa iglesya.
- k) gumawa ng kabutihang panakip sa iyong mga kasalanan.

Sagot: 10. a) magsisi ng kasalanan at maniwala sa Ebanghelyo.

Magsisi

Ito'y nangangahulugang dapat mong ikalungkot ang nagawa mong mga kasalanan at talikdan ito.

Pagsisihan ninyo't talikdan ang inyong mga kasalanan at maniwala kayo sa Mabuting Balitang ito! Marcos 1:15.

Ikinalulungkot mo ba ang pagsuway mo sa Diyos? Naipasiya mo na bang ipaalís ang kasalanan sa iyong buhay, o kasalanang ibig mong manatili? Handa ka bang magsuko ng lahat, at mula ngayo'y gagawin yaong nakalulugod sa Diyos?

Ang Gagawin Mo

11. Sauluhin and sinabi ni Jesus sa Marcos 1:15.

12. Ang magsisi ay nangahuhulugang

----- a) dapat kang malungkot sa nagawa mong kasalanan at talikdan ito.

----- b) ipagtatapat mo sa isang pari ang lahat ng iyong kasalanan.

----- k) hihingi ka ng tawad saka ipagpapatuloy pa rin ang mga bagay na ito.

Sagot: a) dapat kang malungkot sa nagawa mong kasalanan at talikdan ito.

May umapi ba sa iyo ng labis kaya't ayaw mo na siyang patawarin? Matitinding kasalanan ang pagkapoot at pagkimkim ng sama ng loob. Maraming tao ang hindi nakapapasok sa langit bunga nito. Ang Diyos ay pag-ibig at hindi siya mapananahanan sa isang pusong tigib ng kapootan at sama ng loob. Kung may sama ka ng loob sa kapuwa, patawarin mo siya ngayon. Patulong ka sa Diyos upang matutuhan mong ibigin yaong umapi sa iyo nang labis.

Ngunit kung hindi ninyo pinatatawad ang mga nagkakasala sa inyo, hindi rin kayo patatawarin ng inyong Ama. Mateo 6:15.

Kung pinag-aalinlanganan mo pa na ikaw'y matapat ng nakapagsisi, malulutas mo ito kaagad, sa pagtalikod mo sa lahat ng kasalanan at pagsusuko ng sarili upang ang kalooban ng Diyos ang mangyari sa iyong buhay magmula ngayon.

Ang Gagawin Mo

13. Kung mayroong nakagawa sa iyo ng kamalian, dapat

----- a) kang tumahimik at huwag magpahalatang napopoot ka sa kanya.

----- b) mo siyang patawarin ngayon din.

----- k) mong ipagsabi sa lahat ang kasamaan niya.

Sagot: 13. b) dapat mo siyang patawarin ngayon din.

Maniwala Sa Ebanghelyo: Manampalataya Kay Jesu-Cristo


Ang salitang EBANGHELYO ay nangangahulugan ng MABUTING BALITA. Ito ang mabuting balita ng pagliligtas ni Jesu-Cristo. Ang sumusunod na turo ng ebanghelyo ay matatagpuan sa Biblia. Sulatan ng oo'yaong pinaniniwalaan mo:

▲ Mahal na mahal ka ng Diyos kaya't sinugo Niya ang Kanyang anak na si Jesus upang umako ng kaparusahan mo. _____

- ▲ Namatay si Jesus para sa kasalanan mo. Palalayain ka Niya sa mga ito kung tatanggapin mo Siyang Tagapagligtas at Panginoon. _____
- ▲ Muling nabuhay si Jesus at nagbalik sa Langit. Idinadalangin ka Niya at ipinaghahanda ng isang tahanan. _____
- ▲ Kapag tinanggap mo si Jesus bilang Tagapagligtas, ikaw'y magiging anak ng Diyos at magkakaroon ka ng bagong buhay sa Kanya. _____
- ▲ Babalik si Jesus upang kunin ang para sa Kanya at dalhin sa tahanan sa Langit. _____
Sinampalatayanan mo bang lahat ito? _____
Tinanggap mo na ba Siyang sariling Tagapagligtas? _____ Kung hindi pa, manalig ka sa Kanya ngayon. Paniwalaan mo ang mga pangako Niya.

Sumampalataya ka sa Panginoon Jesus, at maliligtas ka - ikaw at ang iyong sambahayan. Mga Gawa 16:31.

At ito ang patotoo: ipinagkaloob sa atin ng Diyos ang buhay na walang hanggan at ito'y makakamtan natin sa pamamagitan ng Kanyang Anak. Ang pinananahanan ng Anak ng Diyos ay may buhay na walang hanggan, nguni't wala nito ang hindi pinananahanan ng Anak ng Diyos. I Juan 5:11, 12.



Ang Gagawin Mo

14. Ang ebanghelyo ay
- a) mabuting balita ng pagliligtas ni Jesu-Cristo.
 - b) pangangaral.
 - k) tuntunin ng iglesia.
15. Sauluhin ang Gawa 16:31 at I Juan 5:11, 12.

Sagot: 14. a) mabuting balita ng pagliligtas ni Jesu-Cristo.

Ang pagsampalataya kay Jesus ay pananalig sa Kanya. Nauunawaan ka Niya't mahal ka. Idina - dalangin ka Niya sa Ama. Tanging si Jesus ang pinili ng Diyos na gumawa nito.

Sapagka't iisa ang Diyos at iisa ang Taga - pamagitan sa Diyos at sa mga tao, ang taong si Cristo Jesus. I Timoteo 2:5.

Kay Jesu-Cristo lamang matatagpuan ang kaligtasan, sapagka't sa silong ng langit ang Kanyang pangalan lamang ang ibinigay ng Diyos sa ikaliligtas ng tao. Mga Gawa 4:12.

Sinabi ni Jesus, *Ako ang daan*. Walang ibang landas o daan patungo sa Diyos. Hindi ka makalalakad nang sabay sa dalawang landas. Kailangang iwan mo ang alinman sa landas na sa akala mo'y maghahatid sa iyo sa Diyos upang makasunod ka kay Jesus, ang tangi at tunay na daan. Kailangang sumampalataya ka sa Kanya nang lubos.

Kung talagang nakapagsisi ka, naniniwala sa mga pangako ng Diyos, at nananalig kay Cristo na iyong tanging Tagapagligtas, ikaw ay ligtas.

Ang Gagawin Mo

16. Itinuturo ng Biblia na

----- a) si Jesus ang tanging daan patungo sa Diyos.

----- b) maraming landas patungo sa Diyos

Sagot: 16. a) si Jesus ang tanging daan patungo sa Diyos.

Nais mo bang matiyak na si Jesus and iyong Tagapagligtas? Nais mo bang italagang muli ang iyong buhay sa Diyos at tiyaking kasama mo Siya sa paglakad? Sabihin yaon sa tulong ng panalangin **io**.

Panalangin

Salamat sa iyo, Diyos, dahil sa pag-ibig Mo sa akin at sa pagsusugo sa Iyong Anak na si Jesus upang mamatay para sa akin. Tinatanggap ko Siya bilang aking Tagapagligtas at Panginoon. Salamat sa pagpapatawad Mo sa aking mga kasalanan at sa pagtanggap Mo sa akin na Iyong anak. Tulungan Mo akong lumakad na kasama Mo habang buhay. Amen.